

quod potentia ex se indifferens ad opposita, ad alteram partem determinetur, nisi quia vult ; ergo necesse est, ut illa determinatio libera sit voluntaria per seipsam, loquendo de primo actu libero elicitive, ut nunc loquimur, nam si sit liber per denominationem a priori actu, erit etiam voluntarius per denominationem ab eodem, quia est eadem proportionalis ratio ; tamen cum non possit in infinitum procedi, necessario sistendum est in aliquo actu, qui primo, et per se sit liber per immediatam dimensionem a potentia libera, et hunc necesse est per se ipsum esse voluntarium, et in se includere necessariam determinationem potentiae ad hunc actum potius, quam ad oppositum, nam in hujusmodi potentia, quae se determinat ad sumum actum, determinari ad operandum, et operari non sunt distineta, quia neque operatio potest intelligi sine determinatione, nec determinatio sine operatione, quia necessario esse debet actus secundus additus potentiae. Atque hinc obiter confirmatur ratio supra tacta, sectione secunda, num. nono : ob quam sola potentia appetitiva potest esse formaliter libera, quia in sola illa potest actus esse per se ipsum voluntarius et determinatio libera includit essentialiter rationem voluntarii. Et ex hoc ipso principio sumenda est ratio, ob quam ad solam potentiam appetitivam potest pertinere munus, seu officium movendi alias potentias efficaciter quoad exercitum, de quo infra.

10. *Tertium dubium.* — Tertia quæstio, utrum e contrario ratio voluntarii sit etiam inseparabilis a ratione liberi. Sunt enim, qui dicant, quod licet voluntarium in communi abstractendo a perfecto et imperfecto possit reperiri absque libero, non tamen voluntarium perfectum, ita ut ratio liberi sit veluti differentia specifica, et contrahens commune voluntarium ad rationem voluntarii perfecti. Quod sentit Almainus, citatus n. 2, et sequitur Conradus, 1, 2, q. 6, a. 2, et loquuntur proprie de libertate necessitati opposita. Et ratio eorum esse potuit, quia perfectum voluntarium esse debet ex sola et propria determinatione voluntatis, quæ solum reperitur in determinatione libera, nam si sit necessaria, jam non est a voluntate, sed a natura : unde magis videtur esse ab extrinseco, quam ab intrinseco : defuit ergo ibi perfecta ratio voluntaria.

11. Dicendum tamen est liberum non esse de ratione voluntarii perfecti, posseque hujusmodi voluntarium sine libero reperi. Exemplum est in amore beatifico circa Deum clare

visum, ille enim non est liber in propria significacione, qua nunc utimur, ut in superioribus tract. 1, disputat. 9, sect. 1, n. 7, contra Scotum probatum est : et similiter amor quo Deus se amat, et quo Pater et Filius producunt Spiritum sanctum, est omnino necessarius absque controversia, alias Spiritus sanctus, ut etiam contra eundem Scotum arguebam, lib. 6, de Trinitat., cap. 4, non necessario esset; quis autem neget, aut beatos amare Deum perfecte voluntarie, aut (quod absurdius est) Deum amare se ipsum, et Patrem et Filium producere Spiritum sanctum ex voluntario perfecto. Ratione vero ostenditur, nam hujusmodi voluntarium quamvis non sit liberum, potest procedere ex ratione et cognitione perfecta ; et ex perfecta voluntatis facultate operantis toto suo impetu et conatu juxta perfectissimam propensionem suam ; ergo nihil ibi deest ad perfecte voluntarium. Antecedens constat facile ex exemplis adductis : consequentia vero patet, quia voluntarium est, quod est ex cognitione ab intrinseco ; ergo quod est ex perfectissima cognitione, et maxime ab intrinseco, erit perfecte voluntarium. Confirmatur, quia, ut supra, sect. 2, n. 5, dixi, nec libertas dicit perfectionem, simpliciter respectu eiusque objecti, nec necessitas dicit semper imperfectionem ; sed voluntatis perfectio in hoc consistit, ut feratur in unum quodque objectum, modo illi debito pro qualitate illius, et juxta mensuram bonitatis et necessitatis eius : ergo quando voluntas fertur in objectum necessario, eo quod excellentia objecti postulat illum modum tendendi, que excellentia perfecte cognoscitur ab operante ; tunc voluntas perfectissimo modo tendit, et alioqui fertur ex intrinseco impulsu : ergo nihil illi deest ad perfectissimum voluntarium. Neque enim refert, quod objiciebatur supra, in fine n. 10, determinationem illam voluntatis videri esse a natura, et non a voluntate : tum quia licet sit a natura radicaliter, tamen effective, et vitaliter est ab ipsa voluntate, unde non est ab extrinseco, sed ab intrinseco : tum etiam, quia illamet ratio naturæ includitur in essentia ipsius voluntatis : est enim voluntas essentialiter natura quædam : unde operari ex naturali impetu ipsius voluntatis, non excludit quin operatio talis sit omnino ex voluntate, atque adeo perfecte voluntaria.

12. *Quartum dubium.* — Quarta quæstio plane de modo loquendi est, utrum actus perfecte voluntarius, etiamsi sit simpliciter necessarius, dicendum sit liber, nam Scotus citatus,

et alii contendunt ita esse appellandum, in quo favent modo loquendi haeticorum hujus temporis, et ideo cavendum est hoc locutionis genus, quamvis in re non possit esse differentia, dummodo constet libertatem, quæ tali actui tribuitur, non esse illam, quæ necessaria est ad merendum, et ad peccandum, ita ut peccatum tribuatur ad culpam operanti. Atque hoc modo est certissimum actum illum non esse liberum ea libertate, quæ proprie necessaria est ad liberum arbitrium. Unde philosophi, qui dixerunt Deum operari ex necessitate naturæ, non negabant illum operari per intellectum et voluntatem, et consequenter perfecte voluntarie : negabant tamen eum esse liberi arbitrii, quam tamen libertatem fides catholica illi attribuit : haec ergo libertas propria non est in praedicto actu necessaria.

13. *Primus gradus liberi, seu libertatis.* — Ut vero hoc plenus explicetur, et intelligantur varia loca Sanctorum supra in hac, et superiori sectione insinuata, notandum est *liberum* ex prima impositione significare id quod est sui juris, et alteri non est subjectum : unde videtur directe excludere relationem servitutis : unde in l. *Libertas, ff. de Statu hominum*, dicitur, *libertas est facultas ejus quod cuique facere libet, nisi quod ei, et lege prohibatum est.* Atque ita vulgari sermone homo ingenuus dicitur liber, atque hinc translata est hæc vox ad significandam libertatem voluntatis nostræ : in qua varii gradus considerari possunt, dicitur enim voluntas nostra libera a coactione, nam coactio est magna quædam servitus, et ideo parentia illius, libertas dici potest, et in hoc sensu operatio perfecte voluntaria, quantumvis necessaria, potest dici libera, quia nihil coactionis habet, et in hoc sensu est vera propositio Augustini, *voluntas, aut voluntas non est, aut libera dicenda est*, si intellegitur de actu, nam de ipsa potentia res esset facilior.

14. *Secundus gradus.* — Secundus gradus est, in quo excluditur, non tantum coactio, sed etiam necessitas simpliciter, et hæc est perfectior libertas, cum majorem subjectionem excludat, et hoc sensu nos loquimur de libertate juxta usum magis receptum. Sic etiam loquitur sepe Augustinus, et videre licet, lib. de Perfectione justitiae, respons. 9, et in eodem sensu (ut opinor) 1 Retractat., cap. 15, *voluntatem esse motum animi cogente nullo*, nam ibi cogere sumit pro eodem, quod est necessitatem imponere, ut constat ex contextu, qui modus loquendi est frequens apud Patres, ut

patet ex Cyrillo, catech. 4, et Irenæo, cap. 71, Bernardo, de lib. Arb.

15. *Tertius gradus.* — Tertius gradus excludit non tantum coactionem et necessitatem absolutam, sed etiam necessitatem infirmitatis (ut sic dicam), et inductionis, seu prævæ consuetudinis, quæ libertas est perfectior, et dicitur fuisse in statu innocentiae, in quo voluntas erat libera a captivitate corporis mortalis, et a fomite, quo inducitur ad peccandum, et hanc voco infirmitatem humanæ naturæ : atque hoc sensu dicitur homo peccando amisisse libertatem, et incurrisse necessitatem peccandi, non quia in aliquo actu simpliciter necessitetur, sed quia absolute non potest vitare omnia peccata mortalia sine Dei gratia, venialia autem, neque per gratiam, quæ ordinarie datur, seclusis privilegiis. Atque hoc sensu videtur loqui Concilium Carthaginense, cum ad Innocentium scribit, nostrum liberum arbitrium per gratiam Dei vere fieri liberum, dum a carnalium concupiscentiarum dominatione liberatur. Et in eodem sensu intelligendus est Augustinus ubicumque de hac materia loquitur, et præsertim in illo libro de Perfect. justitiae, respons. 9, ubi sic ait : *Victa vitio, in quo cecidit voluntarie, caruit libertate naturæ*, scilicet hac perfectissima libertate, et sic dicitur ibidem necessitatem peccandi per peccatum inductam, non excludere quin homo sua libertate peccet. Et eodem modo intelligendus est Bernardus, serm. 81, in Cantie., nec multum differt, quod dicit D. Thomas, quæst. 6, de Malo, art. unico, ad 23, scilicet hominem peccando liberum arbitrium perdidisse, quantum ad libertatem a miseria, et ad 24, dicit quod consuetudo peccandi facit necessitatem non simpliciter, sed in repentinis.

16. *Quartus gradus.* — Quartus gradus adiungi potest, quod *libertas* dicat non tantum parentiam necessitatis simpliciter, sed etiam obligationis ; sic 1, ad Corinth. 7 : *Non habens necessitatem, sed potestatem habens suæ voluntatis.* Et hinc etiam quando lex est imposta, quanto est suavior, et magis in amore, quam in timore fundatur, eo magis dicitur lex libertatis, et contraria lex servitutis, de quo vide Irenæum, 2, contr. Hæret., cap. 29, et Augustinum, toto lib. de Spiritu et Littera.

17. *Quintum dubium.* — Quinta quæstio, in actu, qui simul est voluntarius et liber, quid sit, vel quid addat esse liberum. Quidam enim existimant esse aliquid reale intrinsecum ipsi actui, quod potest fieri verisimile : primo, quia hoc esse liberum est magna perfectio actus,

nam ratione illius est dignus laude, vel capax meriti, si bonus sit, et e contrario dignus poena, si malus. Secundo, quia in hoc esse *libero* fundatur totum esse morale, quod est aliquid reale in actibus. Tertio, quia si esse voluntarium, est aliquid reale in actu, cur non esse liberum, cum non sit minus perfectum.

18. Dicendum vero est actum esse liberum, praeter voluntarium perfectum, solum addere habitudinem, seu denominationem a potentia eliciente actum, et habente potestatem ad suspendendum illum, seu eliciendum oppositum. Hæc opinio tribui solet Scoto, in 2, d. 40, et Durando, d. 30. Sed in his locis nihil dicunt hi auctores; Durandus vero, in 2, d. 38, favet huic sententiae, quatenus dicit, *esse morale* nihil addere supra ipsum actum in esse naturæ praeter denominationem a potentia. Ratio vero fundamentalis est, quia ex hoc præcise quod concipiatur actus perfecte voluntarius, et a potentia, quæ ita operatur, ut sit in facultate ejus non operari, intelligitur actus liber; posito autem quocumque alio modo, seu entitate intrinseca, et præcisa hac beatitudine, seu denominatione, non intelligetur actus liber; ergo superfluum est fingere hujusmodi modum, seu entitatem.

19. Hæc autem ratio duobus modis potest explicari et confirmari. Prior est, quia in potentia libera in actu primo duplex potestas intelligitur, prior ad eliciendum actum, posterior ad retinendum illum, quatenus ergo elicit actum, utitur priori potestate, et ille influxus præcise consideratus sufficit ad voluntarium, quia hoc ipso est actus a principio intrinseco cum cognitione; at vero ex vi illius influxus præcise non intelligitur actus liber, nisi intelligatur facultate operante, altera potestas, per quam, ut sic nihil influit in actum, quia non est potestas agendi, sed potius non agendi; ergo actus non consummatur in *esse liberi* per positivum influxum potentiae, sed per denominationem a potentia quatenus potest non agere: ergo non constituitur per aliquod intrinsecum additum actui supra rationem voluntarii.

20. Secundus modus explicandi ratione, est distinguendo ea, quæ in actu possunt considerari. Primum est entitas ipsius actus, ut est qualitas quædam, et in eo, ut sic, non intelligitur ratio liberi: quia hæc ratio intrinsece includit dimanationem activam a potentia, sine qua neque intelligi potest libertas, quia hæc non potest primo consistere in recipiendo, sed in actione; nisi quis fortasse dicat actum ex vi suæ entitatis intrinsecæ, postulare talem mo-

dum dimanationis cum libertate. Et haec ratione ex vi suæ entitatis intrinsece dici posset liberum: quod ita declaratur, quia talis actus necessario includit hanc reflexionem, quia per illum vult potentia, quæ de se est indifferens determinari ad hanc partem potius quam ad aliam, quod non convenit actui necessario, atque in hoc sensu vere dicetur libertas includi in ipsa entitate. Sed quamvis hæc responsio videatur apprens, et subtilis, tamen re vera non est necessaria, nec facilis intellectu: quia quando potentia de se indifferens in actu primo determinatur ad unum objectum tantum elicit simplicem appetitionem illius objecti, et hoc ipso determinat suam indifferentiam ad illud objectum, et illum actum: sed hoc totum fit per actum ipsum, ut voluntarium supposita indifferentia potentiae: ergo superfluum est fingere alium modum entitatis, seu reflexionis. Ac præterea totum hoc non sufficit sine modo dimanationis, seu dependentiae actus a potentia.

21. *Cum actus idem transit de libero in necessarium, oportet ut ejus dependentia varietur.*—Secundo ergo considerari potest in actu libero actualis dependentia ipsius qualitatis a potentia vitali, et posset quis dicere hanc dependentiam esse talen in actu libero, ut non possit esse ejusdem rationis in actu necessario, atque ita illam esse quid intrinsecum actui a quo denominatur libera. Sed circa hoc considerandum est actum, qui ex natura sua postulat fieri libere, interdum fieri posse necessario Deo necessitante potentiam, et tunc verum mihi videtur necessarium esse mutare dependentiam, quam actus ex natura sua haberet ex sua potentia, et sub illa libere fieret, quia intelligi non potest actum ex se liberum fieri necessario, nisi facta aliqua mutatione, vel in ipso actu, vel in dependentia actus a potentia. Sed hic non fit mutatio in actu, ut supponimus, neque in aliqua alia re, quia sine mutatione intellectus, vel alterius potentiae potest Deus necessitatem inferre voluntati: ergo necesse est mutationem fieri in dependentia ipsa.

22. Quod aliter confirmatur, nam si Deus nunc concurrit cum libera voluntate servata libertate ejus, et postea stante eodem objecto infert illi necessitatem ad eumdem actum, necesse est, ut aliter concurrat: quomodo enim potentia extraheretur a suo connaturali modo operandi, nisi Deus aliter in illam, vel cum illa efficeret? necesse est ergo, quod concursus Dei sit distinctus: ergo et concursus ipsius voluntatis, variata enim actione respectu cau-

sæ primæ, necesse est etiam variari respectu causæ secundæ, quia est una, et indivisibilis actio: dependentia ergo actus liberi respectu necessitatis ab extrinseco provenientis est aliquid intrinsecum actui distinctum a concurso necessitante, nihilominus tamen illa dependentia non denominaret actum liberum nisi cum denominatione et habitudine ad potentiam habentem vim, et facultatem ad suspendendum talem influxum per se ipsam ab intrinseco: ergo esse liberam ultimo constituitur per hanc denominationem. Unde probabilissimum est, si actus liber fiat necessarius intrinsece, non esse necessarium mutare hanc dependentiam, sed solam diversam applicationem objecti, ut si quis diligit Deum libere per fidem, et immediate transeat ad visionem, poterit continuare eumdem actum amoris necessario amando ab intrinseco, et tunc non oportet mutare, nec qualitatem, nec dependentiam ejus, quia hoc solo quod ratione diversæ cognitionis intelligatur voluntas impotens ad suspendendum actum, intelligitur actus esse necessarius, etiamsi fiat per eamdem dependentiam: et idem intelligi poterit in actibus indeliberalis voluntatis, nam ex sola advertentia eorum sine mutatione physica facta in voluntate intelliguntur manere liberi, quia ex vi solius advertentiae rationis voluntas fit potens ad tollendum actum: ergo sola dependentia sine habitudine ad potentiam potentem suspendere actum, non dat formalem esse liberum.

23. *Quid alii ulterius considerent in actu libero.*—Tertio præter hæc duo fingi posset in actu aliquis alius modus intrinsecus, a quo denominaretur liber. Tamen hoc multo majori ratione rejiciendum est, quia neque explicari potest quid sit iste modus, neque quæ sit necessitas ponendi illum: ac denique quia semper illo posito urget illa ratio quod solus ille sine habitudine ad facultatem habentem virtutem ad suspendendum illum actum, non constitueret esse actum liberum: hæc autem habitudo adjuncta rationi voluntarii perfecti statim constituet liberum sine illo modo: ergo ille superflus est. Quod tandem confirmatur, quia stante eodem voluntario, atque eodem influxu positivo voluntatis, potest augeri, vel minui liberum mutatis causis extrinsecis, ut sunt passio, vel advertentia rationis, quia ratione illarum intelligitur esse in voluntate major, vel minor potentia ad suspendendum actum: ergo signum est rationem liberi consumari in hac habitudine, seu denominatione ab hac potestate.

25. *Ad fundamentum in numero tertio et sequentibus.*—Ad fundamenta adducta in contrarium, a num. 3, quod attinet ad omnia testimonia dicemus duo. Primum in omnibus illis sermonem esse de homine viatore, in quo voluntarium perfectum, et liberum se semper comitantur in omni actu, et hinc fit, ut indiferenter vocent actionem liberam voluntariam, et e contrario: quod etiam attigimus, lib. 6, de Trinit., cap. 3, et eadem ratione D. Thomas, 1, 2, quæst. 6, voluntarium perfectum explicuit per potestatem operandi, et non operandi,

loquitur enim de homine quatenus per actus suos in beatitudinem tendit. Secundum est voluntarium perfectum et liberum ex eadem radice oriri, scilicet, ex perfecta cognitione intellectuali, ex quo fit, ut nunquam subjecto separantur, omne enim agens liberum potest perfecte voluntarie operari, et e converso, et hac de causa unum pro alio frequenter usurpat. Ad rationem autem ibi tactam in n. 5, solutio etiam est facilis: nam perfectio libertatis licet conjuncta sit cum perfectione voluntarii modo nuper exposito, tamen formaliter non sunt omnino idem, ut dictum est.

SECTIO IV.

Quotuplex sit voluntarium?

1. *Prima divisio voluntarii.* — *Secunda divisio.* — Diximus an, et quid sit voluntarium, consequens est, ut explicemus alias divisiones ex quibus nonnullae sunt clariores, quae ex dictis colligi possunt. Primo enim dividi potest voluntarium in illud quod objective tantum, seu concomitanter se habet, et in voluntarium active, seu causaliter, de quo dictum est, sect. 1. Secundo posterius voluntarium subdividitur in voluntarium imperatum, seu quod est tale per denominationem ab alio actu, et *elicitum*, quod per seipsum est intrinsece voluntarium per denominationem intrinsecam, quod etiam explicatum est supra.

2. *Tertia divisio.* — Tertia divisio est in perfectum et in imperfectum, quam attigit D. Thomas, 1, 2, quest. 6, art. 2, de qua plura, sect. ultima hujus disput. Nunc circa voluntarium imperfectum (nam perfectum jam satis explicatum est), solum adverto non satis explicari per ordinem ad appetitum, seu cognitionem sensitivam, nam etiam in voluntate potest esse voluntarium imperfectum, ut constat ex motibus primo primis, qui ex imperfecta advertentia rationis procedunt: Illud ergo erit voluntarium imperfectum, quod procedit ex imperfecta cognitione objecti non satis dijudicando, et considerando ratione boni et mali, que in ipso sunt. Unde fit, ut in hoc imperfecto voluntario possit esse magna latitudo, qualis esse potest in advertentia imperfecta, tamen in ea divisione communiter sumitur, ut excludit a voluntario perfectum usum rationis, qui ad libertatem sufficiat, juxta capacitatem objecti, quomodo facile explicatur hoc membrum per privationem alterius membra.

3. *Quarta divisio.* — Quarto dividi potest voluntarium in se, et in alio, quae divisio confundi solet cum alia divisione voluntarii in directum et indirectum: sed nos illas distinguimus claritatis gratia: quod videtur fecisse D. Thomas, 1 part., quest. 77, art. 7, et q. 3, de Malo, art. 1, ubi voluntarium in alio vocat voluntarium implicitum et virtuale: Voluntarium ergo in se satis clarum est, tunc enim aliquid dicitur in se voluntarium, quando in se est volitum, ita ut voluntas immediate versetur circa illud, vel per actum proprium, si sit voluntarium directum, vel per parentiam actus, si sit indirectum, ut dicam.

4. *Exponitur secundum membrum praedictarum divisionis.* — Circa voluntarium autem in alio, est imprimis advertendum interdum vocari voluntatem interpretativam, quae presumitur futura fuisse in aliquo si advertisset, aut si rem cognovisset, ut quando per epicheiam fit aliquod contra tenorem legis, dicitur actus ille interpretative voluntarius legislatori, quia si hic et nunc cognovisset circumstantias talis actus, voluisse illum fieri, sed si quis recte consideret, hoc non est propter voluntarium, nam si quis omnino ignorans casu occidisset inimicum, ita tamen esset dispositus, quod si sciret esse inimicum facilius occideret, non propterea actio illa censemur illi voluntaria, quin potius Aristoteles vocavit illam non voluntariam, et dici etiam potest non involuntaria. Unde haec interpretatio potius deseruit, ut actio censeatur non esse contra voluntatem alterius, verbi gratia, superioris, quam ut censeatur esse ab ejus voluntate, et ideo dico non esse voluntariam illi, neque involuntariam quod est observandum ad ferendum judicium in rebus moralibus, quae pendeant ex voluntate alterius, et interdum dici solet sufficere in eis voluntatem interpretativam. Sed oportet distinctione uti, nam si ad honestatem actum sufficit, quod non sit alteri involuntarius, verbi gratia, quod non sit prohibitus a superiore, tunc satis erit voluntas interpretativa, si revera, moraliter loquendo, talis sit: si autem necessaria est positiva voluntas, seu positivus influxus alterius procedens ex voluntate ejus, tunc satis non erit interpretativa voluntas praedicto modo explicata, quia revera nulla est, ut dixi, ut in materia de confessione, si ad valorem actus necessaria est jurisdicatio a superiore collata, non sufficit praedicta interpretatio, sed necesse est, ut aliquo modo constet de superioris voluntate. Quocirca hoc voluntarium interpretativum non est, de quo in praesenti agimus, quia

DISPUTATIO I. SECTIO IV.

175

voluntarium in alio, non solum non est involuntarium, sed est vere, ac positive voluntarium, non quidem per actum, qui immediate ad ipsum terminetur, in hoc enim distinguitur a voluntario in se, sed per actum, qui terminatur immediate ad illud, in quo virtualiter, seu moraliter contineri censemur id quod dicitur voluntarium in alio, ut cum quis vult comedere cibum suae saluti contrarium, aegritudo inde contracta dicetur voluntaria non in se, sed in alio, id est, in appetitu cibi.

5. *Primum dubium circa proxime dicta de voluntario in alio, quid exigat ex parte intellectus.* — Circa hoc autem voluntarium duo inquiri possunt, primum, quid ex parte intellectus sit ad illud necessarium. In quo breviter dicendum requiri ut aliquo modo sit cognitum, quia sicut nihil est volitum, quin praecognitum, ita nihil est voluntarium quin aliquo modo cadat sub cognitione operantis. Sed hoc duplice potest accidere primo quod sit directe praevisione: secundo, quod sit in potestate operantis illud praecogitare, et animadvertere, ac quod ex negligencia hoc facere omiserit: et eterque modus satis est ad hujusmodi voluntarium, ut ex D. Thoma colligatur, 1, 2, quest. 73, art. 8, et quidem in primo modo cognitionis nulla est difficultas, in secundo vero est maxima, quam attingemus in disput. 4, agentes de ignorantia.

6. *Secundum dubium quid exigat ex parte voluntatis, ut a quibusdam resolvitur.* — Secundo dubitatur in hoc puncto, quid requiratur ad hujusmodi voluntarium ex parte voluntatis: cum enim in hujusmodi voluntario duo sint objecta, quorum unum ex alio sequitur, et ideo dicitur voluntarium in illo: videri potest ad hujusmodi voluntarium satis esse, quod illa duo objecta sint inter se connexa, et quod connexio sit aliquo modo praewisa ut volito uno objecto censeatur volitum aliud, quod ex illo sequitur, nam si hoc non sufficit ad hujusmodi voluntarium, sequitur culpam peccatoris esse Deo voluntariam hoc ipso, quod vult dare illi concursum suum praevidens infallibiliter peccatum futurum. Sequitur etiam mortem innocentis esse voluntarium militibus comburentibus dominum, hoc solo quod voluntarie efficiunt combustionem, ex qua vident futuram esse mortem innocentis.

7. Propter haec dici solet praeter connexionem rerum, et scientiam ex parte intellectus necessariam esse obligationem vitandi unum, ne sequatur aliud, sine qua nullum erit voluntarium in alio, atque ita in dictis exemplis illa

non sunt voluntaria ex defectu hujus obligationis. Aliis vero hoc non placet, quia praecipuum cum sit extrinsecum, nihil videtur posse conferre ad voluntarium: quod esse debet ab intrinseco, sed solum ad hoc est necessarium praecipuum: ut id quod alioqui voluntarium est imputetur, vel non imputetur ad culpam: actus enim non ideo est voluntarius quia est malus, vel contra praecipuum, sed potius e contrario, ut actus sit malus, et contra praecipuum proprie prærequisitum, ut sit voluntarius: ergo praecipuum non causat voluntarium, sed supponit.

8. *Decisio auctoris per distinctionem.* — Mihi tamen in hac re distinctione utendum videatur; duobus enim modis accidere potest, ut posita actione in se voluntaria aliquid sequatur. Primo quod sequatur per se ex vi meae actionis præcise sumptæ. Secundo quod non sequatur per se, neque ex vi illius tantum, sed ex aliis adjunctis: ita tamen, ut hic et nunc infallibiliter sequatur, et secundum prævideatur. Exemplum vulgare est, si quis videat alium peccatum eo quod ipse dat eleemosynam, vel aliquid simile operatur. Primo ergo quando effectus est prioris rationis, ut censeatur voluntarius in alio, sufficit ex parte voluntatis, quod prior actus sit voluntarius directe, et in se nulla habita ratione praecipi. Ita sumo ex D. Thoma, 1, 2, q. 37, a. 8, ubi rationem indicat, quia talis effectus per se censemur constitutere unum, et ad eamdem speciem pertinere cum sua causa. Et hoc sensu habet verum, quod dici solet, qui vult antecedens, vel etiam consequens sufficienti cognitione supposita. Unde in hujusmodi voluntario praecipuum solum ad hoc conferre potest, ut illud voluntarium sit turpe, vel honestum, nam si effectus, verbi gratia, prohibitus sit, necesse est, ut sit etiam prohibita causa, ex qua per se, et ex præcisa virtute illius sequitur talis effectus, nam cum haec duo sint inseparabilia physice, multo magis erunt moraliter.

9. Secundo addendum est, quando affectus sequitur tantum posteriori modo, ut censeatur voluntarius in alio, necessariam esse obligationem vitandi unum ne sequatur aliud, ut in simili dicemus explicando sequentem divisionem, et hoc confirmant adducta exempla: et ratio est, quia ut aliquid sit voluntarium, prout nunc de illo agimus, necessarium in primis est, ut sit volitum, et deinde ut sit aliquo modo a voluntate: nihil autem hie inventur secluso precepto. Primum patet, quia aliud est esse permisum, aliud esse volitum,